

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. जम्मू-डिविजन च अज्ज लगातार चौथे दिन रेल यातायात ठप्प रेया- जम्मू-श्रीनगर राष्ट्री जरनैली शिड़क अज्ज उप्परोतली चौथे ध्याड़े बी गड़्डियें दी आओजाई लेई बंद - जम्मू संभाग च सब्बै सरकारी ते निजी स्कूल कल 30 अगस्त तोड़ी बंद।
2. केंद्री मंत्री डॉ. जितेंद्र सिंह होरें उधमपुर दा दौरा लाइयै जम्मू-श्रीनगर राष्ट्री जरनैली शिड़क दे हिस्से गी पुज्जे दा नुकसान दा निरीक्षण कीता।
3. उपमुख्यमंत्री सुरेंद्र चौधरी होरें साम्बा ते कठुआ च हाड़ें दी मारा हेठ आए दे इलाकें दा दौरा लाया।
4. समूलचा राष्ट्र हॉकी दे जादूगर खोआने आहले मेजर ध्यानचंद हुंदी जयंती गी अज्ज राष्ट्रीय खेड़्ठ ध्याड़े दे रूपै च मना'रदा ऐ।
5. ते मौसम विभाग नै अज्ज राती'लै जम्मू-कश्मीर च किश थाहरें पर बरखा बरने दी पेशगोई कीती ऐ।

<><><><><><>

Rail-Traffic

जम्मू-डिविजन च अज्ज लगातार चौथे दिन रेल यातायात ठप्प रेया- जेड़ा अग्गे बी प्रभावित रौहग कीजे उत्तर रेलवे प्रशासन नै जम्मू औने जाने आहलियें 40 निर्धारत ट्रेने गी रद्द करी दिता ऐ। तोआई, उधमपुर ते रामबन जिलें च भारी बरखें मगरा कई थाहरें पर पेदी ल्हास-पस्सियें दे चलदे जम्मू-श्रीनगर राष्ट्री जरनैली शिड़क अज्ज उप्परोतली चौथे ध्याड़े बी गड़्डियें दी आओजाई लेई बंद ऐ। मौसम दे खराब सूरतेहाल ते हाड़ें दे खतरे गी दिखदे होई जम्मू संभाग च सब्बनैं सरकारी ते निजी स्कूलें गी कल 30 अगस्त तोड़ी बंद रखने दा हुक्म जारी कीता गेदा ऐ। पेश ऐ इक्क खास रिपोर्ट।

<><><><><><>

Jitendra Udhampur

प्रधानमंत्री हुंदे दफ्तरें च केंद्री मंत्री डॉ. जितेंद्र सिंह होरें अज्ज उधमपुर जाइयै राष्ट्रीय जरनैली शिड़कें दे उधमपुर ते चनैनी मझाटै आहले हिस्से गी भारी बरखें कारण होए दे नुकसान दा जायजा लैता। दौरे दरान डॉ. जितेंद्र सिंह होरें पुर्नबहाली आहले कम्में दा बी आंकलन कीता ते मुतल्लका एजेंसिएं गी निर्देश दिते जे तौले गै मरम्मत आहले कम्में गी पूरा करन तां जे गड़्डियें दी आओजाई गी बहाल कीता जाई सकै। उनें मकामी अधिकारिएं कन्नै बी गल्लबात कीती ते इस गल्लै पर जोर पाया जे इयै नेई स्थिति थमां निब्बड़ने आस्तै समें पर तैयारी करना मता जरूरी हुंदा ऐ। इस दरान बोलदे होई केंद्री मंत्री होरें आखेआ।

<><><><><><>

उपमुख्यमंत्री सुरिंद्र चौधरी होरें अज्ज साम्बा ते कठुआ जिलें दा दौरा लाया तां जे हाल च होई दी भारी बरखें कारण उत्थूं दे हालात दा जायजा लैता जाई सकै। साम्बा च उपमुख्यमंत्री होरें एम्स विजयपुर कश देवक पुलगी पुज्जे दे नुकसान दा जायजा लैता। उनें एन.एच.ए.आई दे उच्च अधिकारिं गी निर्देश बी दिते जे स्थिति दा संजीदगी नै आंकलन करन। इस मौके पर आकाशवाणी समाचार कन्ने गल्ल करदे होई उपमुख्यमंत्री होरें आखेआ।

तोआई, कठुआ जिले च होए दे नुकसान गी दिखदे होई डिप्टी सी.एम होरें केंद्र सरकार गी अपील कीती जे ओह जम्मू संभाग च आए दे आए दे इनें हाडें गी राष्ट्री आपदा घोषित करन कीजे एहदे नै खिते च बड़ा मता नुकसान पुज्जा ऐ। इस मौके पर बोलदे होई उनें आखेआ।

<><><><><><>

Overall Situation

जम्मू-कश्मीर च बल्ले-बल्ले स्थिति हून सामान्य होआ रदी ऐ। हाडें करी प्रभावित केंई सारे इलाकें च हून पानी दा स्तर घटी गया ऐ। जरूरी सेवाएं जियां बिजली, पानी, शिड़क राबता ते मोबाईल नैटवर्क बी बल्ले-बल्ले बेहतर ढंगै सिर ब्हाल होआ करदे न। हालाके अजें बी केंई सारे इलाकें बुरी चाली प्रभावित न जित्थे लगातार बरखें ते चानचक्क हाड़ करी ढांचे गी बड़ा मता नुकसान पुज्जा ऐ। प्रशासन लगातार ते अनथक जतन करा'रदे ऐ तां जे लोकें गी बुनियादी सहूलतां तौले थमा तौले हासल होन। लोकें गी अपील कीती गेई ऐ जे ओ चला रदे कम्में च सरकार दा सहयोग करन।

<><><><><><>

Power Water Supply

जम्मू च बिजली दी बण्ड सरबन्धी कार्पोरेशन JPDCL नै Canal, पौनी चक्क, कटरा, रियासी, राजौरी, दराबा, ज्योड़ियां ते बर्न आहले ग्रिड स्टेशनं दे दायरे हेठ औने आहले इलाकें च अज्ज ते कल बड्डलै 6 बजे शा संजा 6 बजे तगर बिजली बंद रखने दी घोषणा कीती ऐ। एहदे तैहत रियासी-राजौरी-पुंछ ते जम्मू दे किश हिस्सें सने कटरा ते रेलवे ट्रैक्शन System च बिजली बंद रौहग। उआं लाजमी सेवाएं आहले दफ्तरें च मरहलेवार ढंगै नै बिजली दी सप्लाई जकीनी बनाई जाग। ध्यानजोग ऐ जे खराब मौसम करी बिजली ते पानी दी सप्लाई प्रभावत होई ऐ। जल शक्ति मैहकमे दे Chief Engineer होरें लोकें गी बड़ी समझदारी कन्ने पानी दा इस्तेमाल करने लेई गलाया ऐ। उआं पानी ते बिजली सप्लाई दी बहाली दा कम्म जारी ऐ।

<><><><><><>

National-Sports Day

देश भरै च अज्ज राष्ट्री खेड्ढ दिवस मनाया जा'रदा ऐ। एह ध्याड़ा हर बरे 29 अगस्त गी हॉकी दे दिग्गज खडारी मेजर ध्यानचंद हुंदी जयंति पर मनाया जन्दा ऐ। इस ब'रे राष्ट्री खेड्ढ दिवस दा विशे ऐ- “शांतिपूर्ण ते समावेशी समाज गी प्रोत्साहन देने लेई खेड्ढां”। एह विषे इस गल्ल पर जोर दिंदा जे लेई खेड्ढां रुकावटें गी हटाई सकदियां न, टीम वर्क गी बढ़ावा देई सकदियां न ते क्षेत्र, धर्म जां पृष्ठभूमि दे मतभेदें शा परे. लोकें गी किट्ठे आनी सकदियां न। इस आयोजन दे कन्नो-कन्नी “फिट इंडिया मिशन” 29 शा 31 अगस्त तगर त्रै-रोजा राष्ट्रव्यापी कार्यक्रम आयोजित करोग। “एक घंटा खेल के मैदान में” जनेह अभियान लोकें गी हर रोज घट्ट कोला घट्ट 1 घंटा आउटडोर खेड्डें ते शारीरिक गतिविधियें आस्तै समर्पित करने लेई प्रोत्साहित करगंन।

<><><><><><>

तोआई भारतीय सेना, भगवती नगर च तवि नदी पर चौथे पुल दे राएं गड्डियें दी आओजाई ब्हाल करने लेई बेली पुल कायम करने लेई कम्म करा रदी ऐ। ध्यानजोग ऐ जे जंदे मंगलवारें भारी बरखें ते तवी नदी च आए दे हाड़ करी भगवती नगर आहले पुल गी नुकसान पुज्जा हा। सेना दे जोआन इत्थे गड्डियें दी आओ-जाई बवस्थित ढंगे नै यकीनी बनाने ते लोकें गी राहत उपलब्ध करोआने लेई पूरी सरगर्मी कन्नै बेली पुल कायम करने लेई कम्म करा' रदे न। इस बारे होर जानकारी दिंदे होई एसएसपी ट्रैफिक फारूक कैसर होरें आखेआ।

<><><><><><>

Stranded Pilgrims

श्री माता वैश्वो देवी जी दी जातरा गी मुअत्तल कीते जाने दी पच्छोकडै च कटड़ा च फसे दे शरदालुएं दी सखल्ली आओजाई यकीनी बनाने लेई प्रशासन नै ट्रांसपोर्ट सरबन्धी खास बंदोबस्त कीते न। रियासी दे ए.आर.टी.ओ नीरज शर्मा होरें दस्सेआ जे 200 शा मती बसें दा प्रबंध कीता गेआ ऐ तां जे कटड़ा च फसे दे शरदालुएं गी सुरक्षित उन्दे ठिकानें तोड़ी पुजाया जाई सकै। उनें आखेआ ऐ जे अद्द कुंवारी च ल्हास-पस्सियां पौने ते खराब मौसम करी प्रभावित होए दे शरदालुएं गी ट्रांसपोर्ट, खुराक ते आसरमा उपलब्ध करोआने लेई प्रशासन हर रोज 24 घंटें कम्म करा'रदा ऐ। शर्मा होरें इब्बी दस्सेआ जे बक्ख-बक्ख मैहकमें ते ट्रांसपोर्ट आपरेटरें बश्कार तालमेल स्थापित कीता गेआ ऐ तां जे हालात आम ध्याड़ें आहला लेखा होई जाने तगर शरदालुएं गी हर मुमकन स्थूलत दस्तयाब करोआई जाई सकै।

<><><><><><>

G&B Hostel

जनजातीय मामलें दे निदेशक मुमताज चौधरी ते अप्पर सचिव अनजर अहमद राणा होरें अज्ज पुंछ च गुज्जर-बकरवाल होस्टल दा दौरा कीता ते हाल च होई दी भारी बरखें कारण उत्थे होए दे

नुकसान दा जायजा लैता। इस दौरे दा मकसद एहू बी ऐ हा जे होस्टल च रवा'रदे विद्यार्थियें गी दिती जा'रदी स्हूलतें दी समीक्षा कीती जा तां जे उंदी भलाई-बेहतरी च प्रशासन आसेआ कोई कमी नेई होऐ। दौरे दरान दौनें अधिकारियें भारी बरखें कारण ढांचे गी होए दे नुकसान दा मुआयना कीता ते जमीनी सतह दी सूरतेहाल बारें व्यापक जानकारी हासल करने लेई होस्टल दे स्टाफ ते विद्यार्थियें कन्ने गल्लबात कीती। आकाशवाणी समाचार कन्ने गल्ल करदे होई डायरेक्टर मुमताज चौधरी होरें आखेआ।

<><><><><><>

Weather

मौसम विभाग नै जम्मू-कश्मीर दी किश थाहरें पर अज्ज रातीं लै बरखा ते गर्ज-चमक मगरा बरखा दी पेशगोई कीती ऐ। 30 अगस्त थमां पैहली सितम्बर तगर केंई सारी थाहरें पर हलकी थमां दरम्याने दर्जे दी बरखा पौने दे आसार न जिस्सलै के जम्मू खिते दे किश जिलें च दरम्याने दर्जे थमां भारी बरखा पौने दी शेंका बी जताई गेई ऐ।

<><><><><><>
